

# Tam Tam

(synt 1994 underwäggs)

Gueten Oobe zämme – sin iir alli doo?  
zem Schnitzelbängg go singe, sin miir do iine koo  
an jeedem Fescht – iir kenned s scho – isch s bi uns Brogramm  
mr singe zämme nonem Väars Tam Taram Tam Tam

*Tam Taram Tam Tam Tam Tam Tam Taram Tam Tam*

Dr Bundesroot loot sich impfe - as Voorbild, daas macht Sinn  
dr Parmelin froogt voor em Byygs, isch doo Wysse drin?  
s waigeret sich d Frau Käller-Suter, die wäär as näggschti draa  
ych hätt lieber Botoggs fir d Underlibbe ghaa

Bi miir het s scho dr Dierarzt gmacht, lacht d Amhäard hüereglatt  
dr Ueli rächnet und sait zem Doggder, ab drei ha ych Rabatt  
jeede het e Aeggstrawuurscht, waas wird bim Berset koo?  
Si, bi däm bricht d Noodle ab, dr Gscheiter git halt noo

Dr Hasselhoff verkauft sy Kitt, das Auti, wo ka schnuure  
soll y biete oder nit? Gäll, s raizt di naime duure  
dausig PS, gaili Kische - hösch Digge, loos es sii  
bim Autifaare schnuurt di Frau allewyyl scho drii

Dr Fluughaafe z Berlin wird ereffnet - no vierzää Joor saggschwach  
niin Joor z spoot - am zwaite Daag saicht s dääne scho duur s Dach  
dr Fluughaafe basst zue de Mensche deert, säll isch kai Skandaal  
e Schwoob, wo nit ganz dicht isch, isch aigetlig normaal

Du, Giachem, joo, d Martullo Blocher isch huere intelligänt  
as Eerschti drait si soo e Masgge. Z Bäärn im Parlamänt?  
Jo, Giachem, wäg däm Goroona. Gian, y ha daas tschegg  
no scheener wäär, die hätti dr ganzi Grind verdeggt

Exgyysi, miir sin z spoot und hoffe, iir wäärdet is verstoo  
dr Pre vor em Pre vor em Pre-Abberoo hänn miir vorusse gnoo  
dr Abberoo vor em Abberoo het guet doo, kaa me saage  
ooni dä kasch s Zuuger Volgg - higgs - aifach nit verdraage

D Gasche-Rächtnig goot an Bassgall, däm vergoot grad s Lache  
er lyytet schyych ys Tam Tam aa „isch do no ebbis z mache?“  
vergiss säll, Bassgall! Koole aane, waas kunnt diir au in Sinn?  
stryched ai Pre-Abberoo - und s Gäld isch wiider dinn!

Sii, miir hänn e Aafroog griegt, und zwoor vom ZSC  
dr Raiz isch grooss - d Gasche au! - joo, die zaale mee  
miir geen nit und erglääre ime nätte Brief  
drotz heggster Gasche isch is s Niwoo z Ziri aifach z dief

. . . s goot hindedraa wyter !

. . . dr Aafrang isch uf dr andere Syte !

Dr Scherroom Bee - s Nummere zää - fäält ebbe bim Drainiere  
er hoggt lieber im Schtudioo und loot sich dedowiere  
si, säll hilft iim jeedes Mool, wenn er in Aagriff goot  
uff em rächte Aarm stoot riisegrooss, wo s Gool vom Gägner stoot

My Soon, dä spiilt scho gly im Ains, sait schtolz dr Babbe Giisi  
au ych ha im Glubb Groosses glaischtet und mecht no lang drbii sii  
Groosses glaischtet? Bim EVZ? Miir hänn rescherschert  
er het verschwitzti Lyybli gwäsche und Bhausetee serviert

Wäär kennt iin nit, dr Schtandard-Schpruch vom Bassgall - jo, genau  
mit Härzbluet fiert er eyri Kasse - du, dä Siech isch schlau  
drnääbe daucht er fir d Armee - Gristallglubb, iir hänn Muet  
e Kassier, wo underdaucht - ou, das kunnt nit guet!

Swiss Raw Whisky challenge - dr Yyves hoggt nit im Boot  
er sufft deheim dr Whisky, will säll vvyll besser goot  
do im Glubb macht er s glyych - do zaigt sich sy Talänt  
ruedere mien die andere, är isch Bresidänt

Dr Glingbärg raist fir s Lääbe gäärn, d Schwyyz isch wunderscheen  
nit ganz so scheen isch sy Schnuure - deert fääle zwai, drey Zeen  
in synere Stammbaiz het dr Wirt sofort reagiert  
ney git s numme fir dr Karl Wurschtsalaat büüriert

Dr Loosli faart uss em Wallis haim, scho het s Händy gschällt  
s isch dr Bassgall, dä wott schnuurre iiber Gott und d Wält  
dr Loosli kaa daas eländ Gschnurr schtundelang verdraage  
er weiss, dr Bassgall het deheim syt Joore nit me z saage

Hoggeyaaner sinn Spitzespoortler, drainiere intensiiv  
dr Dominigg moolt scheeni Bilder ass Ussglich - greatiiv  
ney moolt er Ettigette am freye Mäntig Oobe  
am Zyschtig gläbbt er si uff d Fläsche in dr Garderoobe

Du Giachem, joo, kennsch du au dr Richi Rüegg vo dr CVP?  
joo, dasch däää, wo so vvyll schnurrt - miir dien d Oore wee  
deheim het dä au CVP! Wie mainsch das? Kai System,  
deert haisst daas Computer-Verständnis-Problem

Dr Loosli bringt dr Wyy an Matsch, broo Spiil e ganzes Fass  
uns isch glaar: ooni Wyy macht e Matsch kai Spass  
sy Motto „s kunnt am Schluss scho guet“ - sii ka s nit verstoo  
d Prisca steent, ou wäär s deheim im Näscht doch au esoo

So, das wäär s fir hitte gsi vo unserem Schnitzelbangg  
hoffedlig hän iir Fraid dra gha, mr saage härzlig dangg  
gaile Uffdrift, y bi zfriide - hösch Digge, und du, waas saisch?  
so vvyll kaa ain gaar nit suffice, as s Zuugerland verdraisch!

*Tam Taram Tam Tam Tam Tam Tam Taram Tam Tam*